

Voda i biodiverzitet

22 May 2013

Međunarodni dan biološke raznolikosti se obilježava 22. maja svake godine. Ovaj datum je proglašen od strane Ujedinjenih nacija međunarodnim danom bioraznolikosti (biodiverziteta) s ciljem da se podigne svijest o značaju i ugroženosti biljnog i životinjskog svijeta na planeti Zemlji. Većina nas se na sam pomen biodiverziteta upita: "Šta je to biodiverzitet i kakav je njegov značaj"? Najprostiji odgovor je da je to sve ono živo što nas okružuje, to je raznolikost živog svijeta i njegovih procesa odnosno sama priroda. Raznolikost živog svijeta određenog područja predstavlja bogatstvo u ekološkom, ekonomskom i društvenom pogledu, te ima ogroman značaj kada je u pitanju život i opstanak čovjeka na tom području.

Svijet u kojem živimo, kao da ne želi znati da su prirodni resursi koje nemilosrdno iskorištavamo iz dana u dan ograničeni. Ponašamo se kao da će ih uvijek biti tu i u dovoljnim količinama. Zbog takvog ponašanja biodiverzitet, odnosno priroda trpi nepremostive gubitke. Vrste koje nastanjuju našu planetu nestaju 1.000 puta brže nego što bi to bilo prirodnim putem. Planeta Zemlja posustaje i ne može više da prati gramzivost našeg čovjeka.

Područje naše općine je dijelom područja "endemskog razvojnog centra". Upravo na ovom području se rađaju nove vrste, koje će jednog dana biti spremne da se šire dalje i pronalaze prostore adekvatne za njihov život. Područje u kojem živimo jedno je od prirodno najvrijednijih područja u Bosni i Hercegovini. Upravo zbog ovoga, moramo biti i puno pažljiviji prema prirodi u kojoj i sa kojom živimo. Na području općine Konjic nalaze se iznimno vrijedna područja kao što su planina Prenj, planina Visočica, rijeka Neretva, Boračko jezero, rijeka Rakitnica, rijeka Ljuta, Vrtaljica i dr.

Voda je neophodna za život. Nema živog bića na planeti zemlji koje može živjeti bez vode. Voda je preduslov za zdravlje i dobrobit čovjeka, kao i preduslov za očuvanje prirode. Slučajno ili ne ovogodišnji dan voda obilježava se pod motom "Voda i Biodiverzitet". Upravo u ovom periodu, Federalno ministarstvo okoliša i turizma je izdalo okolinske dozvole za izgradnju "mini" HE na rijeci Ljutoj, od kojih su tri HE sa velikim branama (visine preko 30 m) i to upravo u onom najvrijednijem dijelu vodotoka kada je u pitanju biodiverzitet, onom kanjonskom. Eventualnom realizacijom ovog projekta biti će nanesene značajne štete po iznimno vrijedan biodiverzitet ovog područja.

I dok priroda svakim danom gubi po jedan dio sebe i svoga postojanja zahvaljujući u prvom redu našoj prevelikoj pohlepi, mi ne radimo ništa ili radimo jako malo, da pomognemo prirodi da preživi i da sačuva biodiverzitet i svrhu svoga postojanja, ako ne zbog nje - prirode, onda zbog nas samih. Povedimo računa o prirodi, o neprocjenljivoj vrijednosti biodiverziteta, povedimo računa o našoj budućnosti i budućnosti generacija koje dolaze, a kojima prirodu moramo ostaviti jer smo je od njih posudili.